

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- प्रधानमंत्री नरेन्द्र मोदी होर अज्ज अष्ट लक्ष्मी महोत्सव दा उद्घाटन करगंन। एहदा मकसद पूर्वोत्तर राज्य दी संस्कृति ते कला गी प्रदर्शित करना ऐ।
- 175 किलोमीटर लम्मी गुरदासपुर-जम्मू गैस पाइप लाइन दा कम्म शुरू होई चुके दा ऐ ते गैस सप्लाई 2024 तगर शुरू होग। डॉ. जितेन्द्र सिंह होरें आखेआ जे एहदा मकसद नागरिकें दे जीवन गी सखल्ला बनाना ऐ।
- मुख्मन्त्री उमर अब्दुल्ला होरें आखेआ जे ओह राज्य दा दर्जा ब्हाल करने आले मामले गी प्रधानमंत्री ते गृहमन्त्री हुंदे कन्नै पुट्टगंन।
- आरएनयू जम्मू अज्ज अपना 54मां स्थापना दिवस मना'रदा ऐ।
- मुख् सचिव अटल डुल्लू होरें आखेआ जे जम्मू च मुबारक मंडी इक टकोह्दी सैलानी थाहर बनोग।

<><><><><><>

PM-Ashta Laxmi

प्रधानमंत्री नरेन्द्र मोदी होर अज्ज भारत मंडपम नमीं दिल्ली च अष्ट लक्ष्मी महोत्सव दा उद्घाटन करगंन। त्रऊं रोजा इस उत्सव च पूर्वोत्तर दा सांस्कृतिक, समाजिक ते आर्थिक ताना बाना प्रदर्शन कीता जाग। महोत्सव सब्बने 8एं राज्यें दी संस्कृति, कपड़ा उद्योग, हथखण्डी ते पर्यटन दे इलावा उत्थूं दे शानदार उत्पादें लेई इक मंच प्रदान करोग। इस दरान 250 शा मते शिल्पकार, 34 जीआई टैग आलिएं चीजें सनें बेजोड़ दस्कारी ते कृषि बागवानी उत्पादें दा प्रदर्शन करगंन। इस कार्यक्रम च इक फैशन शो, डिजाइन कनक्लेव ते खरीददार ते विक्रेता सम्मेलन बी आयोजित कीते जांगन।, जेह्ड़े सार्थक सैह्योग प्रदान करने दे कन्नो कन्नी आर्थिक तौरा उप्पर प्रभावकारी सिद्ध होंगन।

<><><><><><>

Gas Pipe Line

गुरदासपुर थमां जम्मू तवि तगर 175 किलोमीटर लम्मी, महत्वकांक्षी कुदरती गैस पाइप लाइन दा कम्म शुरू होई गेआ ऐ। मेद ऐ जे इस परियोजना राएं 2026 तगर जम्मू च घरेलू इस्तेमाल लेई पाइप लाइन राएं रसोई गैस दी सप्लाई शुरू होई जाग। इस बारै इक जानकारी सांझी करदे होई विज्ञान ते टैक्नालोजी राज्यमंत्री डॉ. जितेन्द्र सिंह होरें सोशल मीडिया एक्स पर लिखेआ जे भारतीय गैस प्राधिकरण जीएआईएल दिल्ली कटड़ा एक्सप्रेस वे दे कन्नै कन्नै गैस पाइप लाइन बी बछा करदा ऐ ते एह्दे लेई कठुआ ते हीरानगर च वाल्व सेक्शनलाइजिंग दा कम्म शुरू होई चुके दा ऐ। डॉ. सिंह होरें आखेआ जे प्रधानमंत्री नरेन्द्र मोदी हुंदी अगुवाई आली सरकार आस्सेआ आम लोकें दा जीवन सैहल-सखल्ला बनाने दे कम्में च एह् परियोजना बी इक महत्वपूर्ण मील दा पत्थर साबत होग।

<><><><><><>

CM-Statehood

मुख्यमंत्री उमर अब्दुल्ला होरें आखेआ ऐ जे ओह् जम्मू कश्मीर गी परतियै राज्य दा दोआने दे मुद्दे उप्पर प्रधानमंत्री नरेन्द्र मोदी ते गृहमंत्री अमित शाह हुंदे कन्नै पुट्टगंन। कल शोरे-कश्मीर आर्युविज्ञान संसिीन अस्पताल, श्रीनगर दे 42में स्थापना दिवस दे मौके पर आयोजित इक समारोह च हिस्सा लेने मगरा पत्रकारें कन्नै गल्लबात करदे होई उमर अब्दुल्ला होरें आखेआ जे प्रधानमंत्री ते गृहमंत्री होर पैहले महाराष्ट्र ते झारखंड दे चुनाएं च रुज्जे दे हे ते हुन उंदे कयश टैम ऐ ते एह् मुद्दा उंदे कन्नै जरूर पुट्टेआ जाग। मुख्यमंत्री होरें आखेआ जे असेंगी मेद ऐ जे प्रधानमंत्री मोदी होरें लोकसभा चुनाएं दे मगरा विधानसभा चुनाएं च मेरे कन्नै नेई, जम्मू कश्मीर दे लोकें कन्नै जेहड़ा वायदा कीते दा ऐ, ओह् उसी जरूर पूरा करगंन।

<><><><><><>

SIA Police

जम्मू कश्मीर सरकारै प्रदेश जांच अर्जेसी एसआईए दे एसएसपीएं दे दफतरे गी मामले दर्ज करने ते जांच लेई पुसल स्टेशन घोषत कीता ऐ। केन्द्र शासत प्रदेश दे गृह विभाग नै जारी अपनी इक अधिसूचना च आखेआ ऐ जे एसएसपी, एसआईए जम्मू ते एसएसपी एसआईए कश्मीर दे दफतर, जम्मू कश्मीर दिएं हदै अंदर मामले दर्ज करने ते जांच करने लेई पुसल स्टेशन घोषत कीते गे न। एह् अधिसूचना भारतीय नागरिक सुरक्षा संहिता 2023 दी धारा दो-इक तैह्त जारी कीती गई ऐ। पैहली नवम्बर 2021 गी एसआईए दा गठन आतंकवादी सरबंधी मामले दी तेजिया कन्नै जांच करने दे मकसद कन्नै कीती गई ही।

<><><><><><>

OGW-Poonch

पुंछ जिले च पुलसै आतंकवादिएं लेई कम्म करने आले “चार संदिग्ध ओवर ग्राउंड वर्करें” दे घरें छापेमारी कीती ऐ। पुलसै दे इक प्रवक्ता मूजब राष्ट्र विरोधी गतिविधिएं पर रोक लाने सरबंधी अपने जतनें दे हिस्से दे तौरा पर पुलस जिनें लोकें दे घर छापेमारी कीती उंदे च सखी मैदान दे मोहम्मद नासर, देहरी दबसी दे महमूद हुसैन, भाटीधार दे अब्दुल अजीज ते धराना दे मोहम्मद खालिद शामिल न। मन्नेआ जा’रदा ऐ जे एह लोक आतंकवादिएं गी रूट्टी पानी, जरूरी समेयान ते ठैहरने लेई आसरमा उपलब्ध करांदे हे ते होर बी केई चाल्ली उंदी मदद करदे हे। छापेमारी गी पूरी चाल्ली योजनाबद्ध तरीके नै पैहने सबूत किट्टे करियै ते खरी कारवाई करदे होई अंजाम दित्ता गेआ। इस चाल्ली दियां कारवाइयां इलाके च कुसै बी चाल्ली दे आतंकवादी खतरे ते राष्ट्र विरोधी गतिविधिएं पर काबू पाने लेई कीतियां जा’रदियां न। तां जे आम जनता दी सुरक्षा गी जकीनी बनाया जाई सकै। जम्मू कश्मीर पुलसै लोकें अगें अपील कीती ऐ जे ओह कनून नाफिज करने आलिएं अजेंसिएं कन्नै सैह्योग करन ते उंदं आस्सेआ दित्ती गेदी जानकारी आतंकवाद खलाफ लड़ाई च मता सैह्योग देई सकदी ऐ।

<><><><><><>

ADGP-Kathua

जम्मू जोन दे अतिरिक्त पुलस महानिदेशक आनंद जैन होरें कल कठुआ जिले दे बनी—मछेड़ी इलाके च विशेष कारवाई समूह एसओजी दे कैपें दा दौरा लाया ते इलाके च पुलसै दी सुरक्षा तैआरिएं दा जायजा लैता। उंदे कन्नै सीआरपीएफ दे जम्मू सैक्टर दे महानिरीक्षक आर.गोपाला कृष्णाराव ते कठुआ दे एसएसपी शोमित सक्सेना बी गेदे हे। दौरे दरान एडीजीपी होरें लोवांग ते दुगौनी च एसओजी कैपें च उपलब्ध सुविधाएं उपकरणों दी दस्तआबी ते सिखलाई दे बारे तफसीली निरीक्षण कीता। उनें एसओजी दे कर्मिएं कन्नै गल्लबात बी कीती ते सुरक्षा प्रबंधें, आतंकवाद रोधी रणनीतिएं ते बन्ने कन्नै लगदे इलाकें च पैदा होने आलिएं चुनौतिएं कन्नै निबड़ने दिएं तैआरिएं दी बी तफसीली जानकारी हासल कीती। एडीजीपी होरें जोर देइयै आखेआ जे सुरक्षा सरबंधी मुद्दें कन्नै असरदार ढंगै सिर निबड़ने लेई सिखलाई दे उपरोतली जारी रखे जाने पर जोर दित्ता। उनें एसओजी दे कर्मिएं गी जोर देइयै आखेआ जे आतंकवाद ते होरने अपराधें खलाफ एहतियाती कारवाई लेई सदा सौहगे सतर्क ते तैआर रौहन। उनें इलाकें च सुरक्षा जकीनी बनाने लेई होरने सुरक्षा अजेंसिएं कन्नै तालमेल बधाइयै इक टीम आला लेखा मिलियै कम्म करने गी प्रोत्साहित कीता।

<><><><><><>

RNU Raising Day

आकाशवाणी दा क्षेत्रीय समाचार एकांश जम्मू अज्ज अपना 54मां स्थापना दिवस मनाऽ करदा ऐ। इस सिलसिले च एकांश आसेआ अज्ज केई सारे कार्यक्रम करोआए जा करदे न जिंदे च हूनै शा किश चिरै मगरा ठीक साङ्गे

9 बजे, 30एं मिनटें दा इक विशेष कार्यक्रम दा प्रसारण शामिल ऐ। एहदे अलावा अज्ज संझा 7 बजे बी 15एं मिनटें दा इक विशेष कार्यक्रम प्रसारत कीता जाहग। अपने कर्मिं दी हौसला-अफज़ाई लेई, ऐकती स्थापना दिवस दे मौके पर इक सम्मान कार्यक्रम दा सरिस्ता बी कीता जा'रदा ऐ जेहदे च 2024 ब'रे दे बेह्तरीन समाचार सम्पादक, डोगरी ते गोजरी दे बेह्तरीन समाचार वाचक ते अनुवादक, बेह्तरीन जिला संवाददाता ते जनरल स्टाफ श्रेणी च बेह्तरीन कर्मी दे सम्मान भेंट कीते जाडन। 2024 आले लोकसभा ते विधानसभा चुनाएं दरान आकाशवाणी दे विशेष कार्यक्रमें लेई टकोहदा जोगदान देने आहलें गी बी अज्ज सम्मानित कीता जाहग।

<><><><><><>

CS-Mubarak Mandi

मुख्य सचिव अटल डुल्लू होरें कल मुबारक मंडी विरासती परिसर दा दौरा कीता ते पिछले किश ब8रे दे दरान कीते जा'रदे इस परिसर दी मरममत सजाने सोआरने ते संरक्षण दे कम्में दी समीखा कीती। इस दरान उनें मुबारक मंडी दिएं पुरानिं इमारते दे ढांचे गी समें सिरेया सोआरने परैंत उंदे रख रखाव बारे भविष्य दिएं योजनाएं बारे बी जानकारी हासल कीती।उ उनें आखेआ जे इस एतिहासिक विरसे दा रखरखाव दे संरक्षण बड़े सकीले कन्नै कीते जाने आला कम्म ऐ जेहदे लेई तकनीकी तौरा पर माहिर ते तर्जुबेकार लोकें दी लोड़ पौंदी ऐ। दौरे दरान मुख्य सचिव होरें वुराने ढांचे जिंदे च राजा राम सिंह मैहल ते राजा अमर सिंह मैहल ते अजैब घर आली इमारत दे कम्में दा निरीक्षण बी कीता जेहदी मेद ऐ जे तौले गै परतियै तैआर होई जांगन।

<><><><><><>

JK-Highway

शिड़क यातायात ते राश्ट्रीय जरनैली शिड़क सरबंधी मंत्री नितिन गडकरी होरें लोकसभा च जानकारी दित्ती जे 2 ज्हार 74 किलोमीटर राश्ट्रीय जरनैली शिड़कें दा रखरखाव ते उंदी मरममत आला कम्म पिछले 5 ब'रे च जम्मू कश्मीर च होआ ऐ। मंत्री होरें आखेआ जे सरकार नै मजूदा राश्ट्रीय जरनैली शिड़के दे नेटवर्क दे रखरखाव गी तरजीह दित्ती ऐ ते एहदे रखरखाव लेई पूरा पराता सरिस्ता तैआर कीता ऐ।

<><><><><><>

Weather

पिछले 2 हफ्ते दरान उच्चिं धारें पर होई दी बर्फबारी दे बावजूद जम्मू कश्मीर च बरखा घट्ट होई ऐ। मौसम विभाग दा गलाना ऐ जे अक्तूबर 2024 मगरा बरखा च 72 फीसद दी कमी दर्ज कीती गई ऐ। मोसम विभाग आस्सेआ तैआर आंकड़े मूजब 70.5 मिलीमीटर सामान्य बरखा दी थाहर जम्मू कश्मीर च पिछले 2 म्हीने च 19.9 मिलीमीटर बरखा होई ऐ। आंकड़े मूजब जम्मू कश्मीर दे मती सारी थाहरें पर 60 फीसद थमां 99 फीसद बरखा च कमी आई ऐ। मौसम विभाग दे निदेशक डॉ. मुख्तार अहमद हुंदे मूतजब 7 दिसम्बर तगर मौसम आम तौरा

पर खुश्क रौह्ग। 8 ते 9 दिसम्बर जम्मू ते किश थाह्रें पर हल्की बरखा होई सकदी ऐ। दिसम्बर 10 थमां 14 बश्कार मौसम खुश्क रौह्ग ते 15 ते 16 दिसम्बर गी किश थाह्रें पर हल्की बरखा ते बर्फबारी होइ सकदी ऐ।

<><><><><><>